

# BION GUILTS NE PQUIAA

## JUAN

---

¡Diuzh bets!

<sup>1</sup>Laa zha gol rii, pquiaa tib guits rii ziaad lo luu i gon Gay, ne nac luu tib zha ne nziuu lo naa.

<sup>2</sup>Bets, rnab naa lo Dios zigne squi wen mban luu nëz lo me, scaque zaacse grieequia grëtaa ncuaañe gun luu, ni gneedz me guielndaan lo luu.

<sup>3</sup>Ne nlipaa bley naa, zeene biaad bla zha bets ne nu, bzodiidz zho lo naa squitaa ndzinli mban luu, tibaque noxco luu zienal luu mine nac diidzli. <sup>4</sup>Ne nligaa, nodraa pe stib conley zdoonaa zigne rleytaa naa zeene ron naa ine niowse mban grë zha ne biane naa xtiidz Dios lo, zienal zho mine nac diidzli.

<sup>5</sup>Bets, ziyon naa squitaa tibaque noxco luu run luu xyudar grë zha ne nacgrë ne, ni mazdraa zeene nac zho zha ne ziaad stib guiedz. ¡Wen ga! <sup>6</sup>Squi ndxie grëraa zha ne rililadz Jesús, rzodiidz zho squitaa nquialadz luu zho. Bzhiguiel sca, bioxco tibaque squi been xyudar zho zeena grieeelo gdziñ zho zaatne no tsie zho. Sca rdziladz Dios. <sup>7</sup>Sac gon, niapse porne rleynie zho Dios, laa zho brie ziegun zho xtsiin Jesús, ni ib rziguield zho ycaania zho ncuaañe rdeed grë miech ne rililadz Xtiidz Dios. <sup>8</sup>Min co nagon, ib none ne yquiambiaazlo zho, ne none gdeed ncuaañe yquiin zho, zeena dziuun ne xyudar zho ygaaz Xtiidz Dios.

<sup>9</sup>Pxelle naa tib guits lo grëse zha ne no xnëz Dios i, per zig nac Diótrfes gon, men ne racladz so gnabey lo to i, rond me mine rnee no. <sup>10</sup>Gacxe na, telne laa naa guial i, dzigo laa naa glisqui lo me dien pe nacne quiañe me no.

Ni tebaa mincose, na haxta run me ib rbëzlod me grë zha bets, zha bzian ne rlanso i; niicle rdeetegaa me diidz cho gdeed zaatne cuëz zho. Zha ne run mine racladz me, rbee me zho lad grë zha ne nacgrë zho.

<sup>11</sup>Bets, sangue luu gon ib tsienald luu mine run grë zha ne sca run guielntseeb, sinque bioxco güeynal ncuaañe ndzinli. Sac gon, zha ne run niapse ncuaañe ndzinli, xnëz Dios no zho; laa grë zha ne run ncuaañe ntseeb, gard sëeb zho xnëz Dios.

<sup>12</sup>Zig nac Demetr, grëse miech rnee ganle zaacse mban Demetr. Ni rlugaa nliw, sac gon tibaque zienal me mine nac diidzli. Niicle nogaaw, mincoque rnee no, ni nan luu ganle led yed no rquidie.

<sup>13</sup>Ndalraa ncuane no gne naa lo luu, per racladzd naa gzodiidz naaw lo luu lo guits rii; <sup>14</sup>sac laa guic naa no guialgan niob naa luu i, dzigo hor co ziodiidz ne grop ne.

<sup>15</sup>Guiaannie Dios luu sca; peet tsienied guic luu. Grëse xamigw luu zha ne runbey luu nu, laa zho rxeel bdiuzh lo luu. Scagaa bzhiguiel bdeed tib zhibdiuzh naa lo tib tib zha ne nac xamigw ne nëz qui. *Juan*